

SECONDA SESSIONE URDINARIA DI U 2022
RIUNIONE DI I 24 E 25 DI FERRAGHJU 2022

2EME SESSION ORDINAIRE DE 2021
REUNION DES 24 ET 25 FEVRIER 2022

2022 / O1/012

**REPONSE DE MADAME LAUDA GUIDICELLI-SBRAGGIA A LA QUESTION
DEPOSEE PAR MADAME MARIE-CLAUDE BRANCA AU NOM DU
GROUPE CORE IN FRONTE**

Objet : Par une serviziu publicu paisanu

Cara Cunsigliera,

Vi ringraziu per a vostra dumanda.
Aghju u listessu affettu pe a difesa di u serviziu publicu, quellu chì serve a ghjente, chì garantisce un accessu à tutti è da pertuttu.

A vostra dumanda cuncerna a territorialisazione di u Tesoru Publicu è di i servizii di l'impositi ; aghju vistu l'azione ch'avete fattu in Sartè. Ùn sarete micca surprisi sè vi dicu chì si tratta quì di competenze di u Statu. U Cunsigliu esecutivu di Corsica ùn si pò micca, da solu, ingagià.

Di sicuru, mentre chì u Statu ci ricusa l'aspirazione à l'autunumia, purtata da tanti Corsi, hè leghjittimu per noi di dumandalu di spiegà a so logica. Pudemu facilmente pinsà chì u Statu francese hà una logica, ancu un pianu bellu precisu per i territorii ch'avete mintuatu riducendu è ancu chjuvendu i so servizii publichi. Quì, vecu una vulintà chjara d'indibuli isse pieve, ma forse sò troppu pessimista.

A vostra dumanda mi permette quantunque di ramintà chì avemu dighjà participatu à pareghje mubilisazione è riunione chì cuncernavanu a riorganisazione di

i servizii di a Direzione Generale di e Finanze Pubbliche. U Cunsigliu esecutivu ci era, accant'à i sindacati, è in presenza di rapresentanti di u Statu. L'avemu fattu ancu per d'altri servizii di u Statu, sempre ne u rurale.

Avemù parechje volte dichjaratu chì tutte ste decisione di riorganizzazione sò in tutale cuntradizione cù i scopi cumuni di rivitalità di a muntagna è di u rurale. Bella sicura, sò sempre decisione chì si piglianu senza l'avvisu di l'eletti di a nostra Cullettività è di quelli di u rughjone.

L'azione di a Cullettività di Corsica s'hè tradutta cù duie deliberazione :

1) a prima, aduprata à l'unanimità, l'11 di ferraghju di u 2019, da a Camera di i Territorii. Dumandava un muratoriu per a riorganizzazione di i servizii publichi ind'è i territorii di muntagna è prupunia a creazione d'una cummissione ad hoc nant'à i servizii publichi ne i territorii,

2) a siconda, vutata da l'Assemblea di Corsica à l'unanimità, pruposta da u Cunsigliu esecutivu, u 23 di maghju di u 2019. Dumandava a creazione di sta Cummissione cumposta d'eletti di l'Assemblea è di a Camera di i Territorii.

Dopu à què, era statu decisu cù a Prifetta Chevalier, chì una Cummissione mista seria stata messa in piazza per riflette nant'à a carta di l'impiantazione di i servizii publichi.

U Presidente di u Cunsigliu esecutivu vulia assicurà sta dimarchja è dunque, ha scrittu à i Ministri cuncernati, fra quali u Secretariu di Statu incaricatu di a ruralità, Joël Giraud, per ottene un arbitragiu da u Guvernu per ste duie dumande.

Hè stata dinò fatta a pruposta à tutti i Presidenti d'intercummunalità di sustene isse dumande, pensendu chì, oghje o dumane, stu prublema sarà quellu di tutti i rughjoni di Corsica.

Oghje , bisogna à ricunnosce chì sta Cummissione ùn hè ancu stallata è u prugettu di riorganizzazione pare cuntinuà, mà senza nisuna cuncertazione. Per rispondevi altrimenti, diceraghju chì l'impiantazione di i servizii publichi ne u rurale deve, più chè mai, esse u risultatu d'una dimarchja spartuta cù tutti l'eletti corsi, cù un impiantazione di u più grandenunaru di servizii di prussimità per luttà contr'à a desertificazione è incuragisce u mantenimentu di l'attività è di l'impieghi in sti lochi.

Ci tuccarà dunque à rinnovellà insieme a dumanda di muratoriu per tutte e suppressione o riorganizzazione, è a dumanda di stallazione di sta Cummissione.

D'altronde, a seconda parte di a vostra dumanda mi permette d'annuncià, un pocu più prestu chì previstu, chì simu in traccia di travaglià cù Julien Paolini, è a Direzione di e sulidarità territoriale, nant'à un raportu chì vi sarà presentatu da quì à pocu.

Stu raportu vi pruponerà di manera cuncreta a nostra visione di a territorialisazione, di l'accumpagnamentu (mi piace di più issa parolla) che no vulemu

mette in piazza per i nostri territori, cù in priurità un azzione dedicata à i rughjoni i più cuncernati.

Faremu pruposte cù soluzione pratiche, prammatiche, sempre legate à a realtà. Sarà quistione di u mantenimentu è di u sviluppu di i servizii cù lochi chì puderanu diventà punti strategichi per sti rughjoni, costruendu un'offerta di servizii è di rilazione glubale, sempre adattate à u locu, per prupone u serviziu u più necessariu.

U rolu di a CdC hè di gesti, di stimulà è di cuurdinà sti servizii.

Ci tuccherà dinò à megliurà l'accessu, a visibilità è l'efficacità di l'azzione pubblica.

L'avete capitu, cara Cunsigliera, vulemu mette tutta a nostra forza per sustene u serviziu publicu dapertuttu induve i Corsi campanu è induve i Corsi ne anu bisognu.

A ringraziavvi.